

禮見而前與大臣議之則云隨班後可行云去正朝令為隨班而適因雨雪不果然此則自然為之矣今日經筵官之言甚當世子謁見永慶殿則可獨行也其於大廟則世子為亞獻乎獨行乎其言于禮曹預考前規啓之○御夜對○乙巳日暈兩珥○禮曹啓曰世子廟見事考之禮文則世子冊封後即為廟見無祭獻節次而只為前後四拜而已今世子已令隨班則廟見所當速行也傳曰世子廟見事及永慶殿親祭事來月內擇日可也○禮曹啓曰今次視學時不設講書官只令儒生講書耳今之儀注後所取法於儀注并書儒生及講書官而付標歟只書儒生不書講書官歟敢稟傳曰并書講書官於儀注而付標可也○丁未夜五更南方有氣如火

二月戊申朔領議政南袞辭狀云臣年垂六旬得此重證醫技雖精藥餌雖良卒無一效歸於漸盡而已臣今轉側須人能復幾日支持歟重任未解心魂驚惕鬱結于中與病俱痛伏願聖慈特垂矜憫許歸臣職則命雖難續恩猶再生臣今在垂死之中既不避煩瀆又言多失倫采增惶恐迫於情懇冒昧上聞傳曰今觀狀辭懇切且見看病醫書啓單字病證有增無減云帝不帝無關於病之增減然其意以為若見適